

مرند اۆيکو

Mərənd öykü



بايراملىق

يازار: نريمان ناظيم

Web address: www.marand-oyku.arzublog.com

Facebook: www.facebook.com/marandoyku

Email: rezaaydin491@yahoo.com

بايراملىق نریمان ناظم

اوغلانچىق گوزگو قاباغىندا داياندى. ايكى الى ايله كاپشئن ین دۇشونو تومارلايىپ، قولتوغونو يىللندىردى. سونرا آرخاسىندا دايانمىش آناسىنى گوزگودە سوزوب، گولومسەدى. بير داهە اينىندەكى كاپشئە باخدى. گولوش دوداغلاریندان چاغلایىپ اوز- گۆزۈنە يايىلدى. شىلتاق چپىش كىمى ايكى اياغى اوستە گۆيە قالخدى؛ سىچىرايىپ، ماغازادان ائشىگە قاچدى. آرواد “و آ... امى... اوغلان بير دايان گۇروم نەجوردى آخى...” - دئیە، قاپى يا چىخدى. ائشىكدە، ماغازايا سارى گلن كىشى آتیلیپ اويناياراق قاچان اوغلانى ایزلەیرەك تعجوبدن دوداغلارینی گولونچ بير شكیلدە بوزموشدو. بايرام قاباغى ایدی. بازار چوخ تونلوك ایدی. بير آندا اوشاق گۆزدن ایتدی. آما آرواد اوشاغین آردینجا يولا دوشدوكدە، ماغازاچى اوغلان قاپىنین آغزیندان سىسلدى:

-آى خانیم! كاپشئن ین پولون وئرمەدىن... آى خانیم!... اوشاغین قاچماسىنى تعجوبلە ایزلەین كىشى بىردن- بيرە اۇزۈنە گلدی: “هە؟! كاپشئن. نە كاپشئنى؟” اوغلان- “عنابى- نخودى كاپشئنى آلیب پولونو وئرمەمىش گندىر” - دئیە، ایشارە ایلە آروادى گۇستردى.

كىشى درحال گۇتورولوب، آروادى حاقلادى: -آى باجى... آى باجى هارا گندىرسن بس؟ آلدیغین جینسىن پولون وئر آخى، پىىى!! -نە خبرىندىر قارداش، من قاشمىرام كى، قوی گۇروم اوشاق نئجە اولدو- دئیە، آرواد يئنىدن يولا دوشدو.

كىشىنین سسى اوجالدى: -دايان بير گۇروم آ... اوشاق! اوشاغا نە اولاجاق، پولو وئر هر يئرە گندىرسن گئتدآ، سنین قاباغیوى كسن وار؟ آرواد تلەسیك كیفین آچیب الى اسە- اسە پولو سانايىپ، كىشىیە سارى اوزالتدی: -”گل آل! بودا سنین پولون”. كىشى-”ياخشى... بس هانى قالمىشى؟” - دئیە، الینی آروادا سارى آچدى. آرواد تعجوبلە سوروشدو:

-اون بئش مین تومن دئیل مەیه؟

-هە اون بئش میندى.

-بس دای نه ایستیرسن؟ ایکی مینین ده اوغلان اؤزو چیخیب.

کیشی نین گؤزلی قییلدی:

-بورا باخ گؤروم، منی ساریميسان، یوخسا عاغلین آزییدی؟ اونو گؤر هئچ اون بئش مینه تیکرلر!؟

هله پیس- پیس دئیرسن قاشمیرام کی!!

آروادین دوداگی اسدی:

-من قاچان آدام دئیلم، گؤزلیوی سیل، آدامووی تانی! دئیرم اوغلان او یئددی مین دئییب، ایکی

مینین ده چیخیب، دئیرسن یوخ، او او، بو دا من- دئییه، آرواد قاییدی، یئین آدیم لارلا ماغازایا

ساری گتدی.

کیشی اونون دالینجا ماغازایا گیدی: "سن هانسی کاپشئنی وئریسن بونا؟ - دئییه، اوغلان دان

سوروشدو.

-او عنابی- نخودی کاپشئنی.

-نچه دیبسن؟

-اون یئددی مین دئیم، ایکی مینین ده اونا چیخدیم.

کیشی توپ کیمی آچیلدی:

-آی سنین او بونون سینسین. اوولیندنده بللی ایدی سندن آلیش وئریشچی چیخما یا جاق.

گنده به سن کورسان؟ آخی او شوقرییی اوخو دا آ... دئییه. آروادا ساری یؤنلدی:

-منی باغیشلا باجیم، سن دئین اولسون، ایکی مینی ده تخفیف، چیخارت اون مین ده وئر قورتارا!

بو آندا اوغلان دیللندی:

_آغا وآلاه قیمتینی اون یئددی مین تومن یازمیشدین.

کیشی لاپ جینلندی:

-سن دای دانیشما. دانیشما دئیم. اون یئددی مین تون یازمیشدی. هله پیس- پیس ده دیپلوم

آلیر. هئی، آی او سنه درس وئره نین آتاسینا لعنت گل سین...

آرواد توموب قالمیشدی. نهایت -"یوخ، قارداش منیم او قدهر پولوم یوخدور. کاپشئنیوی گنیررم-

دئییه، ماغازادان چیخدی. کیشی ده آروادین دالینجا انشیگه چیخاراق:

-بس یاخشی، اون مین وئر کاپشئنی قایتار، پولووو آل!

آرواد بیر قدهر دوروخسوندو. سونرا دئدی:

-دئیم کی، منیم او قدهر پولوم یوخدور آغا.

بو آندا اوغلان یوبوروب، کیفی آروادین الیندن قاپاراق:

-بس بو کیف قالسین گئت کاپشئنی گتیر!

کیشی غیظیله اوغلانا باخدی:

-لا الاله الا الله. گنده به سن نيه بئله گيژسن؟ آخی او کیف نه يه دهیر؟ او اؤزو دئیر پولوم یوخدو، سن کیفی گیروو ساخلاپیرسان؟!- دئییه، حیرصیله کیفی اوغلانین تاپندن چکیب، آلدی. آروادین دوداغلاری اسدی، آما آغزینداکی سؤزونو یئدی. تکجه بیر باخیشلا کیشی نین آغزینی باغلادی. یولا دوشدو. کیشی ایسه کیف الینده، اونون دالیسینجا یوللاندی.

آرواد بازارین ایچینده، بو تیمچه دن او تیمچه یه، او دؤنومدن بو دؤنومه هئی گیریر- چیخیر... آما اوشاغدان ایز- اثر یوخدور. سانکی بیر دامجی سو اولوب، یئره باتمیشدی. گئتدیکجه اونون نیگرانلیغی، هیجانی آرتیر، سورعتی چوخالیر، یئریشی قاجیشا چئوریلیردی. ماغازاچی کیشی ده نفسی چینلریندن چیخا- چیخا، آروادین دالیسینجا لهله ییردی. ماغازاچی لارین چوخو و بازاردان کئچنلرده، آغیزلاری آچیلی دایانیب، تعجوبله اونلاری سوزوردولر.

هاچاندان - هاچانا اوشاق «آینا - شامدان» ماغازاسینین گوزگولرینده اؤزونه باخا- باخا تاپیلدی. او، بؤیوک گوزگولرده، اینینه گئیدیگی یاراشیقلی کاپشئن نین تاماشاسیندان فرح لئیردی. اوغلانچیق قاباق- قاباغا قویولموش گوزگولرده، اؤزونو نه بیر نه ایکی، بلکه اون لارچا گوردوکدن داها آرتیق ماراقلانیب، هیجانلانیردی.

آرواد اوشاغی گؤرچک جیگر دولوسو بیر نفس آلیر، دیزه چؤکوب، “- امیر... بالا بویووا قوریان اولوم! به سن بورادا نه گزیرسن؟- دئییه، اونو باغرینا باسدی. کیشی ایسه تووشه یهرک اونلارین باشی نین اوستونده دایانیب، کاپشئننی آلماغا تله سیردی.

آرواد اوشاغی ماغازادان چیخارتدی؛ سایخاش بیر یئره آپاریب قولاغینا نه سه پیچیلدادی. سونرا الینی کاپشئنن دویمه سینه اوزالتدی. اوشاق دوداغلارین بیغیب، قیسدی. توواریق اؤزونو دالیا چکدی. ایکی الی ایله کاپشئنن یاخاسیندان یاپیشیب، قولقلادی. آرواد بیر داها اوشاغین بویون اوشادی:

-امیر بالا بویووا قوریان بو کاپشئن اینووه خیردادی. بونو وئر، گنده ک آیری سین آلاق! ها، آ بالامسان- دئییه، آستا- آستا کاپشئنن دویمه لرینی آچیب، زیپینی آشاغا چکن کیمی اوشاق آغلاماغا باشلادی.

آرواد، کاپشئننی اوشاغین اینیندن چیخارتماغا چالیشیردی سا، اوشاق دا عناد کارلیق لا، اؤزونو آناسی نین الیندن قورتارماغا جان آتیردی. کیشی آتجاج حوصله دن چیخدی: “-دی بابام قورتار دآ آ...!-” دئییه، ال آتیب کاپشئنن اته ییندن یاپیشیب، چئویردی، کؤبودلوقلا سیپیریب اونو اوشاغین باشیندان چیخارماغا چالیشدی. آما کاپشئنن اوزو آستار اولسادا، دویمه لری باغلی اولدوغونا گوره، کیشی اوغلانچیقی بیر آز اؤز دالیسیجا سوروندورندن سونرا، کاپشئننی اونون اینیندن چیخاریب، یولا دوشدو. آرواد دلی جه سینه بیر آز یول کیشی نین دالیسیجا قاچدی. کیشی بیر پول بوکومونو جیبیندن چیخاریب آروادا ساری آتدی. پول یئره سپه لندی. آروادین دیشلری قیجیردی:

-تووو سنین او نجابتیوه... آی ی نا کیشی- دئی، قهر بوغازینی بیچه- بیچه، ایلیب یئردن پوللاری دوشورمهیه باشلادی.

* * * *

آرواد اوغلانچیغین بیلەییندن یاپیشیب بازار اوزونو سورویوردو. اوغلانچیق دا آياق لارینی یئره دئیە- دئیە قیشقیر- باغیر سالاراق دیرنیردی. آروادین صبری دای توکندی:
-یئتیم قالاسان دئییرم، اینووه کیچیکدی. ننه سیز قالاسان دئییرم اینووه کیچیکدی- دئیە، آرواد دلی جه سینه اوشاغی شاپالاغین آغزینا وئردی.
بیر نئچه نفر قاچیب اوشاغی آروادین الیندن آلدیلار. یاشلی بیر قادین آروادین قولوندان توتوب، اونو آغزی بازارا آچیلان مچیدین حیه طینه چکیر، بیر سکی نین اوستونده اوتوردارکن:
-قیزیم! آدام آجیياندا اؤزونو ساخلار. نه خبریندیر؟ او طیفیل اوشاغی اؤلدوروسن آخی؟!
باشقا بیر قادین دا، اوشاغی آناسی نین یانینا گتیردی. آروادا بیر آز سو ایچیریب، اوشاغیندا اوز- گؤزونو یویوب اوووتدولار.

* * * *

قیشین سون گونلری نین ایلیق گونشی اینجارسیزجا توتغون بولوتلاری سویونوب، چیخیردی.
آرواد ائله جه اوتوردوغو سکی ده توموب قالمیشدی. اونون گؤزلری، مچیدین حیه طینده کی حووضون اورتاسیندا کی سو لوله سیندن داشلانان سویا تیکلمیشدی.
اوشاق قوزو تکی آناسی نین یانیندا دایانمیشدی. پۇرتوب، قیزارمیش گؤزلرینی آناسینا زیللە میشدی. آرواد گؤزونون آلتی ایله اوشاغین یازیق گؤرکمینی سوزدو. بیر آنداجا بوتون وارلیغی قههره چئوریلیب بوغازینا ییغیلدی. بیردن ال آتیب، اوشاغی اؤزونه ساری چکدی؛ بوتون وارلیغی ایله باغزینا باسدى. بوغازینا ییغیلان قههر گؤزلریندن آخماغا باشلادی.